

एफिसीरालाई

पावलए परींद ओरायो चिथी

आव चिथी एफिसस सहरलाव मन्दलीलाई पावलए भयालखानानी परींद ओरायो ज़ (एफिसी ३:१)। ड़ादा पावल एफिससल स़ोरिम लिद नल परमेस्वरए ओपाँ ओरासथैज़्याव (ओसाचीर १६:१-४१)। आव चिथील मिँरालाई परमेस्वरए येसु ख़ीसनी ओलस ज़ ओरासखैव (एफिसी १:४), स़ोनो प्राइँए याडैताव ब ओज़ालाई ज़ जैद ओरायो सरैःसिउ लिज़्या (१:१०,२२)। ननी ज़ मिँर जो जातलावर तादी ब (२:१४-१५), ओज़ार ताद येसु ख़ीसए ओल्योनिकाव यादैज़्याव असिकर धोल पोगोल ज़ रैःज़्यार (१:६-८)। है जैद मिँरालाई कितावनी खुल्द ओरानैज़्याव, हितावनी ज़ दोव ताके (४:१,१५)।

१ डा पावल, परमेस्वरए ओखतै-नाव येसु ख़ीसए ओसाचीए डाल्योनी जे एफिससलाव येसु ख़ीसए ओसतत लिज़्याव, परमेस्वरए छैँव उमींरालाई आव चिथी परींद ड़ायाचिज़्या। २ परमेस्वर गेबाबु स़ोनो गेप्रभु येसु ख़ीसनी जेल्योदा नियुँ गराँद जेयुँ होलाँ जैद ओयाचिरक।

येसु ख़ीसनिकाव असिकर

३ गेप्रभु येसु ख़ीसए ओबाबु परमेस्वरए उमिन बनै ओघ्योःक। नोए गेलाई ओल ओज़ा येसु ख़ीसए ओक्याँत ज़ स्वर्गताव लिज़्याव अचम्बलाव असिकर गेपुरूसए उजुँनी ज़ जोरैद नैदचासिउ। ४ ड़ादा ओल ज़ गेलाई, 'डाडाक याखत माल्यो छैँवर

घतारक' लिद नाम नम ओमाजैद ज़ ओज़ा येसु ख्रीसए ओदोव येननी ज़ छाँतिद ओनैसिज़्याव। ५निताव छाँतिद ओनैसिज़्यावराए गेल्योदा उयुं थू जैद येसु ख्रीसनी ओज़ार जैन्या ब थःरैद ओनैसिज़्याव। नो ओल ओपैज़्याव मितावनी ज़।

६परमेस्वरए गेल्योदा उयुं गरॉद तोबोका तोबो उयुंलाव ओज़ाए ओक्याँत निताव असिकर अइज़ जोरैद ओयासिउए उमिन ब सघ्योःद गेएज़्या। ७नो ओज़ा येसु ख्रीसए उजिउ भाःद उभी सोभोद ओयासिउए गे गेदोव पापए सजा भरी फोःदचासिक्यो, परमेस्वरए ओकानुन गेबलेःव ब क्याल्दचासिक्यो। परमेस्वरए नाःल्दिउ येन दाद ओयासिउ ते घ्योःव ओदयानी ज़। ८नो ओदया गेक्याँत थुदचाद अचम्बलाव उबुद्धी ब धोल पोगोल ज़ याद नैसिउ।

९नो ओज़ानी ज़ अचम्बलाव ओगोइँनी ओल है उलिज़्याव मितावनी ज़ डादाकिनकाव कप्सिउ सुए ज़ यामासैताव येनर दाव ओपैज़्याव ब सतैदचासिक्यो। १०नो आज्याल सतैद ओयासिउ ओयेनर आवर ज़ — ओल गोइँद ओनैज़्याव बेला ओयोःवत ज़ ओराजैव भरी, नामलावर तादी ब, नमतावर तादी ब, ओज़ा येसु

ख्रीसए उधूँल याजैक्यो। ११ओल ओबताहा दैन्या उमीर जैन्याए जूनी गेलाई ख्रीसए ल्योनी डादाकिन ज़ छाँतिद ओनैसिज़्याव। परमेस्वरए ओयेन भरी डादा ओल उयुंल थःरैद ओदोःज्यावए गे हुनी ज़ ताद गेले।

१२परमेस्वरए फरी गे डादाकिन ज़ ख्रीसलाई गेयुं हुप्द ओक्याँत ख्यासिद लिज़्यावरालाई उमिन सघ्योःदचन्याए जूनी खतैद नैसिउ।

१३जे ब ख्रीसनिकाव अजम्बरी जुनी यान्या साचो ओथा थैद जेयुर सुहुप्द ओपाँत जेहुके। ननी ज़ जे परमेस्वरए ओयाकालाव छैँव पुरूस दैद ओज़ाए उमिनत थामिद नैसिउर जेताके।

१४नो ओयासिउ पुरूस गे उमीरालाई चबनै फुर्सुल जैद ओराएरिज़्याव बताहा ओमायासिवा पै, 'डाज़ारालाई अजम्बरी जुनी यान्या डाले' लिद बैना याद नैसिउ। ननी ब 'डामिन सघ्योःद घयारक' लिद परमेस्वरए निताव येन दोदचासिक्यो।

पावलए असिक निद ओरायो

१५जे, गेप्रभु येसु ख्रीसलाई जेयुं हुप्द परमेस्वरए छैँव उमीराए ल्योदा जेयुं थू जैद नोरास खैद जेलिज़्या दी लिन्या डाथैक, १६जेजूनी परमेस्वरलाई डापोँखारिउ पती धन्याबाद चरैःव ज़ डानैज़्या। १७गेप्रभु येसु ख्रीसलाई

परींज्याव ज़गै मगैव परमेस्वर गोबाबुए ओललाई सरेस्थुन्या ओसक्तीर, ओल उबुद्धीर ब ओयाचिउक लिद डापोंखारिज्या। १८ सोनो परमेस्वरए उखुल्चिज्याव अजम्बरी जुनी आः चाव उलिज्याव ओल्यो लिन्या जेयुंल ज़ थःरैधुन्यार ओतारक लिद ब डापोंखारिज्या। गे छैव उमीरालाई बनै अचम्बलाव युं होलाँ दाव पाँर थःरैधुन्यार ब ओजैचिउक। १९ भन गे ओललाई गेयुं हुप्ज्यावराए जूनी दाद ओयासिज्याव ओसक्तीलाव येनर आः चावर ची यालिज्याव ओल्यो लिन्या थःरैधुन्यार ब ओजैचिउक। २० नो गेजूनी दाद ओयासिज्याव ओसक्ती, स्त्रीसलाई सिउनी ओसोचोइव ओसक्ती ज़। हो ओसक्तीए ज़ फरी स्त्रीसलाई स्वर्गताव ओमान ल्यो पोल नैक्यो। २१ स्त्रीस नो पोल आव जुकल तादी ब, हुन्या जुकल तादी ब, नाम नमलाव लिज्याव भरिराए याडैताव ज़ ताके। है जैद घेप्पा मिन दैवर तादी ब, राजार तादी ब, दै देवतार तादी ब, स्वर्गताव चाकज्यार तादी ब, २२ परमेस्वरए प्राइँ जात ज़ ओज़ाए उखँ धूँल भाःद ब एक्यो, मन्दलीए जूनी ओज़ालाई प्राइँए डैताव ब जैक्यो। २३ मन्दली स्त्रीसए ओक्याँ ज़।

है जैद नाम नमलाव प्राइँ सयोःज्याव स्त्रीस नो मन्दलीनी योःव ज़ ताज्या।

परमेस्वरए ओदयानी अजम्बरी जुनी गेदैके

२ जे ड़ादा परमेस्वरकिन तँदा ताद मादान्या येनर दाद सिउल गनिसिउर जेल्यो। २ हो बेलाक आव मानुवाताव मिँर याबाज्यावदा ज़ जे मनी जेबाज्याव। माचाव पुरूसराए याघेप्पाए उधूँल ब जेलिज्याव। नोए परमेस्वरकिन तँदा लिज्याव भरिरालाई चलैव ज़ यानैज्याव। ३ गे ब ड़ादा नोरास लिद जोत ब गेयुं मानैधुद गेमन लागिउ येनर गेदोज्याव। है जैद गे ब नो उपुर्कावराए माँःती परमेस्वरए उरिस चोवर गेल्यो। ४ हितावत ब परमेस्वरए उयुं बनै ओगराँवए गे निताव मिँरालाई ब उयुं नाद गेलाई मया दासिक्यो। ५ ओल उयुं ओगराँवनी ज़ गेलाई निताव पाप दाद सिउल गनिसिउनी हाइद ओज़ा येसु स्त्रीसस अजम्बरी जुनील बान्या जैसिक्यो। ६ परमेस्वरए गेलाई येसु स्त्रीसस सिउनी सोचोइद स्वर्गत सिप ज़ राज्या चलैन्या जैद नैसिउ। ७ आव भरी ते आव जुक ओखेमोत खर्क ज़ माखेमन्या ओराज्याल ओल उयुं गराँद

ओजा येसु ख्रीसए ओक्याँत गेल्योदा ओदोव मागनिसिधुन्या ओदया सरैःन्याए जूनी ज़। ८ परमेस्वरए ल्योदा जेयुँ जेसुहुबोए उयुँ गराँद बाँचैद नैचिउ। नो जे जेदोवनी माःक, परमेस्वरए अइज्ज ओयाचिउ बरदान ची। ९गे गेदोवनी ताकिन ते सघ्योःसिन्या गेल्यो। १०गे ओल उसिजैसिउर ज़। नो उसिजैसिउ फरी ओजा येसु ख्रीसनी ज़। गेलाई उयुँलाव मिताव येन दान्याए जूनी डादा ज़ थःरैद ओनैसिज्याव।

येसु ख्रीसनी यहूदी मायहूदी तोबो ज़

११जे छुत जातलाव मिँर डादा अछतड जेल्यो लिन्या तामेःच्यो। जेलाई यहूदीराए भाःकिन ज़ ‘क्यालन्या सरैस माजैसिउर’ लिद यासजिमिचिज्याव। खाली नो सरैस ते पाखाताव यहूदी चलन वाज्ज लिज्या। १२हो बेलाक साचो नोराए है यादाचिज्याव मिताव ब जेल्यो। जे डादा ख्रीसकिन अछतड, इस्राएली-रास ब मागनिसिउर, परमेस्वरए ओयाकालाव असिकल ब माल्योर, आव मानुवात बिनु परमेस्वरलावर काताए आस ब माल्योर जेल्यो। १३आज्याल ते जे येसु ख्रीसस सिप ज़

ताद जेले। जे डादा परमेस्वरकिन तादाड ल्योरालाई येसु ख्रीसए उजिउ भाःदद्याद उभी सोभोद ओयाचिउए जेलाई परमेस्वरए ल्योदा रैद नैचिउ।

१४ख्रीसए गे यहूदी मायहूदीरालाई मासखैद नेभा जैज्याव गेखालाव पाँलाई खेम्दद्याद सखैद तोबोल ज़ थोम्सिक्यो। १५नो नेब्लोलाई थोम्द गेलाई ओल उमिनताव साःरो तक्याँ ज़ जैन्याए जूनी उजिउ भाःद गेलाई मासखैज्यावलाई उमिन समैदिक्यो। नो गेलाई मासखैज्याव पाँ पाखाताव मोसाए ओकानुनलाव सर्सिउ यहूदी चलनर ज़। १६ख्रीस क्रुसत तङ्गैसिद ओल उजिउ भाःद ओयासिउनी मिँ भरिरालाई या याल मासखैज्यावलाई खेम्दद्याद तोबो ज़ जैद परमेस्वरस यासखैज्याव। १७ओल आव मानुवात हुद गे परमेस्वरस नजिक ल्यो यहूदीर सोनो जे परमेस्वरकिन तादाड ल्यो छुत जातरालाई या याल सखैन्या पाँर यासथैक्यो। १८ख्रीसए ल्योनी गे नेथोए तोबो छैँव पुरूस ज़ दैद परमेस्वर गेबाबुए ल्योल पसिउ गेदैज्या।

१९है जैद जे आज्याल ते परमेस्वर-किन तादाडावल गनिसिउर जेमाले। परमेस्वरए छैँव उमीरास तोबोल ब गनिसिद जेले, परमेस्वरए

उक्मिंमलावर ब ताद जेले। २० जे अगमबक्तार सोनो ओसाचीराए याथालिउ गज तर्त भाःसिउ मितावर ताद जेले। येसु ख्रीस फरी भिम अदैज्याव गजलाव लुं स्यासो लिज्या। २१ भिम भरी होए ओतर्त अदिद जे लुंए तर्त लुं जोरैसिउ मितावर ताद प्रभुए छैव उक्मिंम जेतानाज्या। २२ ओलस तोबो ताद जे मनी छैव पुरूसनी परमेस्वर लिन्या भिम जेतानाज्या।

छुत जातलावरासकाव पावलए ओग्रेन

३ है जैद जे छुत जातलाव मिंरालाई येसु ख्रीसए ओपां डासथैचिउनी भयालखानाल परिद लिज्याव डा पावलए जे जेजूनी पोंखारिउ ज़ डालिज्या। २ जेलाई परमेस्वरए याव ओपैज्याव असिकर सथैन्या डाकुइत याद ओनैनाज्याव जेसैज्याखेहो। ३ आकिन यादा जां जां सर्द डायाचिउ मिताव परमेस्वरए डादाकिनकाव कप्सिउ पांर सतैद नैद ओयांज्याव। ४ नो पांर चावस जेचिऊकिन 'परमेस्वरए ख्रीसए ओक्यांताव ओदोव येनर पावलए ओसैज्याव ची ओल्यो' लिन्या थःरैन्या जेले। ५ नो पां भरी गेकिन डादाडाव मिंरालाई आज्यालकाव मिताव चावस सतैसिउ ओमालिज्याव। आज्याल ते छैव

पुरूसनी नो पांर येसु ख्रीसए छैव ओसाचीर सोनो अगमबक्ताराए जूनी ओपोःस ज़ सरैःसिउ लिज्या। ६ नो कप्सिउ पां आव ज़ — परमेस्वरए यहूदीरालाई वाज़ ओरायो याकालाव असिक आज्याल ते जे छुत जातलाव मिंराए ब आव गेसथैचिज्याव चाव थानी येसु ख्रीसए ओक्यांतिन यहूदीरास सिप ज़ दैन्या जेताके। जे नोरास तोबोए ओथोर ताद सिप ज़ परमेस्वरए ओराज्यालाव बताहा दैन्यार ब जेताके।

७ डा फरी परमेस्वरए उयुं डाल्योदा गरॉद डाक्यांताव ओदोव ओसक्तीनी नो पां सथैन्यात ओसेवा दान्या ब डाताके। ८ परमेस्वरए उमीं भरिरानी डा प्राइरानी जिम्ज़ा कान्ल ज़ मागनिसिउ डाल्यो। हैदी ब परमेस्वरए नाःल्दिउ असिक याद छुत जातलाव मिंरालाई ख्रीसए ओक्यांताव अचम्बलाव ओपांर भाःन्या जैनाक्यो। ९ हो वाज़ माःक, प्राइं जैज्याव परमेस्वरए डादाकिन ज़ आज्याल पै कप्द ओनैज्याव पांर इतावनी ज़ दोज्याव लिद प्राइं मिंरालाई सतैदचाव ब डादैके। १० गे ओमन्दलीए गेक्यांताव ओदोव येननी स्वर्गताव घेप्पार सोनो यासक्ती ल्योराए परमेस्वरए अचम्बलाव उबुद्धीर घरःरक लिद, ११ परमेस्वरए

डादा ज़ थऱैद ओनैज़्याव मिताव गेप्रभु येसु ख्रीसनी आव येन दोक्यो। १२ अबकिन गे येसु ख्रीसस तोबो ताद ओललाई गेरुँ उहुबोनी ज़ परमेस्वरए ओल्योदा गेबाक गेलाई सुम्सिवा ज़ लिद गेरुँ हुबो ज़ लिज़्या। १३ है जैद जेस डाबिन्ती लिज़्या, डा जेजूनी दैद डानैज़्याव आव दुखर रँद जेरुँ तासतेच्यो। आव भरी जेलाई तान्याए जूनी ज़ लिज़्या।

एफिसीराए जूनी पावलए ओपोंखारिउ

१४ है जैद डा परमेस्वर गेबाबुए ओड़ाक डाघूँदानी फुलुप्सिद डापोंखारिज़्या। १५ नो गेबाबुए ल्योनी नाम नमलाव ओथोराए यामिन नैसिउ लिज़्या। १६ जेजूनी डापोंखारिक, परमेस्वरए अचम्बलाव ओअसिकनी जेलाई छैव पुरूस याद जेरुँल थऱेरिउर ओजैचिउक है डालिज़्या। १७ परमेस्वरलाई जेरुँ जेसुहुबोनी फरी ख्रीसए जेरुँल बास ब ओदोवक। ननी ज़ नैं मेंरास स्रोनी परमेस्वरए ल्योदा मया जेदोकिन रामिउ जरा स्रोनी गज मिताव थऱेरिउ तान्या जेले। १८ है जैद ख्रीसए ओमया गेल्योदा खा ख्योव, खा राँव, खा भेंव, खा उर्जी ल्यो उलिज़्याव, हो छैव उमीरास सिप ज़ घसैरक

लिद ब डापोंखारिज़्या। १९ नो सुए ज़ यामासैंधुज़्याव ओमया सैद वाज़ परमेस्वरए ओगे किताव उलिज़्याव हिताव ज़ जे जेगे ब तान्या ले।

२० परमेस्वरए गेरुँलाव ओचलैज़्याव ओसक्तीनी ओलस गेन्निज़्यावकिन स्रोनी गे है गेलिज़्यावकिन, भन ज़ कुधु दादचासिज़्याव। २१ निताव दादचाज़्यावलाई मन्दली स्रोनी येसु ख्रीसए ओक्याँत पिरी पिरी पै खर्क ज़ माखेम्न्या ज़गै मगैव ज़ ओताक। आमैन।

परमेस्वरए उमिनतावर तोबो क्याँ ज़

४ है जैद डा गेप्रभुए ओयेनए जूनी भयालखानाल लिज़्याव कैदीए डाल्योनी जेलाई है डादाचिज़्या, जेलाई परमेस्वरए कितावनी खुल्द ओनैचिज़्याव, हितावनी ज़ दाव ताके। २ मासऱद, तहस लिद, चाव माचाव गाल्द जे जेल युँ नैद सहिसिद ल्यो ताके। ३ स्रोनी जे जेल खैद परमेस्वरए उपुरूसनिकाव ताज़्याव तयुँ जैद लिन्यादा कलँ ब ल्यो ताके। ४ गे भरी तोबो क्याँ ज़ ताद, तोबो पुरूस दैद, प्राइँ तोबो आसदा ज़ खुल्सिउ गेलिज़्या। ५ प्राइँए गेप्रभु ब तोबो ज़, गेभैव पाँ ब तोबो ज़, गेसछैसिउ ब तोबोनी ज़। ६ प्राइँए गेबाबु परमेस्वर ब तोबो ज़ लिज़्या।



नो प्राडँए गेडैत, प्राडँए गेखार्ल, प्राडँए गेयुँल ब लिङ्या।

ख्रीसए ओगोडँनी सु सु गेबरदान लिङ्या

७ हैदी ब ख्रीसए गे उमीरालाई ओल ओगोडँव मितावनी ज़ ओयेन दान्यात सु सु गेबरदान याद नैसिउ। ८ धर्मसास्त्रल ब अइ लिद सर्सिउ लिङ्या,

“रोत उपुलुसोत
ओराहारैव उसुतुर भरी कैत जैद,
ओल उमीरालाई असिकर
भाःद याएक्यो।”

९ रोत पुलुसोए ओअर्थ आव ज़ — ड़ादा नामल भरिद नाम जील मनी पसिउ ज़। १० नो नामल भरिउ ते स्वर्गताव प्राडँरानी भेःवत पुलुस्द नाम नमलावराए याडैताव ख्रीस ज़। ११ ख्रीसए भाःद ओरायो असिकर आवर ज़ — ओलस ओलस बारिउ-रालाई ओसाचीर याजैक्यो। ख्वारालाई फरी अगमबक्तार, ख्वारालाई ओपाँ फीजैन्या, ख्वारालाई मन्दली-लाव लोम्बा येन दान्या सोनो परमेस्वरए ओपाँ सिऊन्या याजैक्यो। १२ आव बरदानर गे परमेस्वरए

उमीरालाई ओयेन दान्यात पाखो जैद मन्दलीलाई[†] पाथ पारैन्याए जूनी यासिउ लिङ्या। १३ हो ताकिन ची गे युँ हुपन्यात सोनो परमेस्वरए ओज़ा येसु ख्रीसलाई सरेस्न्यात खैवर तान्या गेले, सोनो पाखो ताद ओल ख्रीस किताव ओल्यो, गे ब हिताव ज़ तान्या गेले।

१४ गे माछिप्ताव लुज़ा बाँज़ा स्यासोर लिन्या माःक। निताव मिँए आदा होदाडाव पाँर थैद कैताक अत्ताकलाव सिजैसिउ पाँरादा बाद बले-ज़्यावराए ल्योनी भुकिद नो मिँ बतासए आदानी होदा ओख्याज़्याव पुल स्यासो ज़ ताज़्या। १५ बुरू गे नै मेंरास खैद साचो पाँर दाद प्राडँल ज़ गेप्रभु येसु ख्रीसए ओदोव मिताव गे ब दोनाव ताके। ओल ज़ गेडैताव लिङ्या। १६ गे ओक्यार फरी ओक्यारत जोरैसिद सु सु गेयेन याद ओनैसिज़्याव मितावनी ज़ दाद प्राडँ खैद ख्रीसए उमिनत लिङ्याव गेक्यार छिपद पाखो गेताज़्या।

साःरो युँरैव ताके

१७ है जैद डा गेप्रभुए उमिननी है डादाचिङ्याव पाँ चावस थैच्यो,

†४:१२ ग्रीक खामनी — ख्रीसए ओक्यारलाई। एफि १:२३ चिऊन्या।



जे परमेस्वरए ओपाँ मासैंज्यावराए माँ:ती अन्नाकलाव पाँरादा येनरादा फरी ताबाच्यो। १८नो अन्नाकलाव येन दाज्यावर ते यायुंनी काता ज़ माहुवर परमेस्वरकिन तँदाडावर ताद परमेस्वरए ओल्योनिकाव जिउंनील मागनिसिउर ज़ ताज्यार। है जैद काता ज़ मासैंन्यार, यायुं बनै खावर, १९यालाज माल्योर यातावए, नोर युं माजामो येन दान्यादा याजिउ च्यो च्यो भा:द प्राइँत ज़ लोभ दोज्यार, प्राइँत ज़ फुरी येन ब दोज्यार। २०जे ते ख्रीसए ओयेन नितावनी जेपैसिउ मा:क। २१परमेस्वरए ओपाँ जेथैक, येसु ख्रीसनिकाव साचो पाँ इताव ची ओल्यो लिन्या जेसैंखेहो। २२डादाडाव जेयुँए मादान्या वाज़ खिन्द ओबलेचिज्याव। आकिन ते नो मादान्या जेदोज्याव येनर रास्द, २३सा:रो युं रैव ताके। २४नो सा:रो युं ते छैँव सतलाव येन दान्यात ओल परमेस्वरए ओगेनी ज़ जैसिउ लिज्या।

दान्या मादान्या येनर

२५है जैद धुत पाँ भरी रास्द छुतरास साचो पाँ वाज़ पाँव ताके, काराव ल्यो ताकिन गो प्राइँ तक्याँ ज़। २६कातारात

जेरिस ओचोकिन मादान्या येन तादोच्यो। नो जेरिस हो छचाम ज़ उसिक। २७जो येनल तादी ब सैतानलाई येम ताएच्यो। २८कुज्याव मिँ फरी ताकुक। बुरू उकुइए साचो येन दाद माथैँव मायो:वलाई ओयोक। २९कोभा पाँर जेया:नी ताहुक। बुरू थैज्यावरलाई तान्या चाव पाँ वाज़ पाँव ताके। ३०परमेस्वरए छैँव उपुरूसए उयुँ सघर्द ताएच्यो। नो पुरूसनी ज़ परमेस्वरए गेलाई फाल्न्या छचाम घबाँचिरक लिद थामिद नैसिउ। ३१जे जेल मासखैज्याव युं, रिस चोन्या, युँल नैन्या, थलन्या, अर्काए उमिन बले:न्या, सोनो युँनी कुबातैँ हुज्याव भरी प्या:पी जैद ख्याव ताके। ३२बुरू किताव परमेस्वरए येसु ख्रीसए ओक्याँत मादान्या जेदोव रास्द ओयाचिउ, जे ब छुतलाई जेयुँ नाद जेउपर्त मादान्या ओदोव रासो ताके।

५ है जैद जे परमेस्वरए उयुँलाव ओज्जार जेतावए ओल ओदो-ज्याव येन स्यासो ज़ जे ब दाव ताके। २किताव ख्रीसए गेलाई उयुँ नाद परमेस्वरस सखैँन्याए जूँनी उजिउ भा:द ओयासिउ, हिताव ज़ जे ब छुतए ल्योदा जेयुँ नाद दाव ताके। ख्रीसए गेजूँनी निताव येन ओदोव

परमेस्वरलाई चाव सी डरो धुप
ओचरैःव मिताव ज़ लिज़्या।

मादान्या येन दाज़्यावरास खदेप मालिन्या

३खाली पातज्या पातनीं जैसिन्या,
प्राइंत लोभ दान्या, निताव फुरी येनर
जेल्योड उमिन ज़ तारैःक। निताव
येनर परमेस्वरए छैव उमीरालाई
मासहिउ। ४उतीं माल्यो माचाव
ल०न्या पाँर ब ताताक, आव ब
माचाहिउ ज़। बुरू परमेस्वरए उगुनर
मामेःद धन्याबाद याव ज़ नैच्यो।
५जे ब जेसैंज्या, युं माजामो येन
दाज़्यावर, लोभ वाज़ दोज़्यावर
परमेस्वर सोनो ख्रीसनी निराज्याल
काता ज़ दैन्या मालेर। लोभ दान्या
ते अङ्ग्या पुजा दाज़्याव स्यासो ज़।
६जेलाई निताव अनाकलाव पाँरानी
सुवाराए ताभुकैचिरक। परमेस्वरए
आव पाँरानी ज़ ओलकिन तँदाडाव
लिज़्यावरालाई उरिस चोज़्या। ७है
जैद जे निताव पाँ दाज़्यावरास खदेप
ब तालिच्यो।

पलाँवलाव येन दान्यार

८जे ब ड़ादा चुम चुमोलाव येन
दाज़्यावर जेल्यो। अब ते प्रभुए

ओपलाँलाव येन दान्यार जेतावए हो
मिताव ज़ दोनाच्यो। ९पलाँवलाव
येनर आवर ज़ — साचो सतलाव चाव
येनर दाद, १०“प्रभुए उयुं कातानी होलाँ
जैद डाएके’ लिन्या लिज़्या। ११जे
चुम चुमोलाव अनाकलाव येनरानी
अछतड लिद, ‘नो येन ते चाव माःक’
लिद सतैंदद्याव ताके। १२नो चुम
चुमोलाव मोसिद दाज़्यावराए यायेन
याःनी हाइन्या ब लाज हुव लिज़्या।
१३खाली मोसिद यादोदी ब पलाँवए
सतैंद याएज्याव। पलाँवए मारैःवर
ब यासरैःज्याव। १४है जैद अइ ब
लिज़्यार,

“अ सिउ स्यासो

इल्द लिज़्याव मिँ,

सैसिद सोनिकेदा,

ख्रीसए ओज़गै नक्याँत

ज़गै तारिज़्या।”

१५है जैद आव जेजिउत जोगोइसिद
दाव ताके। मासैन्याराए यादोज़्याव
मिताव माःक, सैसिद दाव ताके।
१६आव गेसमय बनै माचाव ओतावए
परमेस्वरए ओयेन दान्यात मौका
भरी छुपिउ ताके। १७है जैद सैसिद
मालिज़्याव मितावर ताताच्यो।
बुरू परमेस्वरए उयुंलाव येनर
सैंधुन्यार ताच्यो। १८मद छोकोराए

तासमं:सिच्यो। नोए मुखं येन वाज्ज पलेऽयाव। बुरू छैंव पुरूसए सब्याल्लिसद, १६जे जेल खैद प्रभुए उमिनत भजनर गैद, जेरुंल उमिन सघ्यो:दद्यान्या गितर गैद रेंच्यो। २०गेबाबु परमेस्वरलाई प्रभु येसु ख्रीसए उमिननी प्राइँल ज्ज धन्याबाद चरै:व ज्ज नैच्यो।

ज्या-रीलाव पाँर

२१किताव जे ख्रीसए उधूँल लिद ओमान नैद जेएऽयाव, हिताव ज्ज जे जेल ब जेमान नैसिच्यो। २२जे रे दाव मेंमार मनी जेरेराए यामान नैदद्याद यापाँ धूँल लिच्यो। नो मनी 'प्रभुए उजूँनी ज्ज डादोऽया' लिद सम्जिउ ताके। २३ख्रीस गे उमिनतावरालाई बाँचैऽयाव ज्ज। किताव गे मन्दलीए गेडैताव ख्रीस लिऽया, हिताव ज्ज जे जेडैत जेरेर लिऽयार। २४है जैद किताव मन्दली ख्रीसए उधूँल उलिऽयाव, हिताव ज्ज जे रे दाव मेंमार ब प्राइँत ज्ज जेरेराए यापाँ धूँल ल्यो ताके।

२५सोनो जे ज्या दाव खेपार किताव ख्रीसए ओमन्दलीलाई उयुँ नाद उजिउ भा:द ओयासिउ, हिताव ज्ज जे ब जेज्यारालाई जेयुँ ओनाक। २६गेजूँनी ख्रीसए उजिउ भा:दद्याद ओपाँनी

सोनो रील सछैंद गे ओमन्दलीलाई छैंव जैसिक्यो। २७किताव ज्या दाऽयाव खेपाए ज्या ओरैक ओज्यालाई चाव चाव क्वार क्वाइद पाताला पुतुलु ओजैऽयाव, हिताव ज्ज गेलाई ब ख्रीसए उचिहुसिरिऽयाव छ्यामए उजूँनी छैंव, खत माल्यो सोनो ज्जगै ज्जगैव ओमन्दली जैसिऽयाव। २८जे ज्या दाव खेपाराए जेक्याँलाई किताव जेसमारिऽयाव, हिताव ज्ज जेज्यारालाई ब समारिउ ताके। जोए ओज्यालाई समारिऽयाव, होए ओक्याँलाई ओसमारिऽयाव मिताव ज्ज लिऽया। २९क्याँए क्याँलाई सुए ज्ज मासोव, बुरू किताव ख्रीसए गे ओमन्दलीलाई ओसमारिसिऽयाव, हिताव ज्ज मिँए ओक्याँलाई समारिद पाथस नैऽयाव। ३०नो ख्रीसए ओसमारिसिऽयाव ते गे ओक्याँर गेतावनी ज्ज। ३१धर्मसास्त्रल ब इताव सर्सिउ लिऽया,

“खेपाए ओबाबु ओआमालाई रास्द ओज्यास सिप ताद, नोनी तक्याँ ज्ज ताऽयानी।”

३२आव पाँए ओअर्थ बनै घेप्पा लिऽया। डा फरी नो पाँए ओअर्थ आव डासरोल जाँकोसै ख्रीस सोनो मन्दलीराए ल्योदा वाज्ज भा:द डानै।

३३ हैदी ब जे ज्या दाव खेपाराए मनी, जेक्याँलाई किताव जेसमारिज्याव, हिताव ज़ जेज्यारालाई समारिउ ताके। जे रे दाव मेंमार ब जेरेराए यामान नैदचाव ताके।

ज़ा बाबुराए यायेन

६ जे लुज़ा बाँज़ार, प्रभुए उमीर जेतावए जेबाबु जेआमाराए यापाँल लिच्यो। निताव दान्या जेलाई ओचाहित ल्यो लिज्या। २ धर्मसास्त्रलाव दस पाँल इताव सर्सिउ लिज्या,

“बाबु आमाए ओमान नैदचाव ज़ परिए।”

नो पाँत तोबो घ्योःव असिक ब जेरैसिउ लिज्या। ३ नो असिक आव ज़,

“निताव जेदोकिन चाव जिउँनी रैद कुधु बाँचिन्या जेले।”

४ जे याबाबुराए फरी जेज़ारालाई गनका गन दाद यायुँ केःद ताराएच्यो। बुरू परमेस्वरए ओपाँ सिऊद म-लैव ताके।

बाँदार सोनो साहुराए यायेन

५ जे बाँदा लिज्यावर, आव मानुवा-ताव जेसाहुराए यापाँ भैंःद, ‘ख्रीसए उजूनी ज़ डादोज्या’ लिद छेःद यामान

नैदचाद साचो युँस दोच्यो। ६ नो जेयेन मिँरालाई खुसी जैन्याए जूनी वाज़ माःक, बुरू ‘डा ख्रीसए ओनोकोर ज़’ लिद परमेस्वरए है उलिज्याव मितावनी जाँगरस दाव ताके। ७ मिँराए यासेवा जेदोक, ‘आव डादोज्याव मिँराए जूनी माःक, प्रभुए उजूनी डादोज्या’ लिद रेंद ज़ दाव ताके। ८ चाव येन दान्यात, बाँदा जेलिदी ब, माबाँदा जेलिदी ब, ‘किताव येन गेदोज्या, हिताव ज़ प्रभुए ल्योनी गेदैरिज्या’ लिद सम्जिउ ताके।

९ जे साहुराए ब हितावनी ज़ सम्जिउ ताके। जेबाँदाराए डैत जेरिस चोद अखत्यासो जैसिन्या माःक। जेबाँदारास प्राइँए जेर्गे स्वर्गत लिज्या। नोए मिँ रँःद मादोव, येन रँःद दोज्याव।

सैतानस लरैं दान्या हत्यार

१० जेस प्राइँरानी छीनीकाव डापाँ आव ज़ — प्रभुए ल्योनिकाव जेदैव ओसक्तीनी थ०रिद ल्यो ताके।

११ सैतानए जेलाई भुकैव ओपै-ज्याव उबुद्धीलाई वैदचाद ओड़ाक थाँसिन्याए जूनी परमेस्वरए ओयासि-ज्याव हत्यारर भिरिसिउ ताके।

१२ गे दान्या लरैं मिँरास माःक, चुम चुमोलावराए याघेप्पार, यासक्ती



(६:१०-१८)

ल्योर, दै देवता भ्या मोर, सोनो नमताव माचाव पुरुसरास लिज्या। १३ है जैद माचाव बेला उहुक नितावराए ल्योनी जोगोइसिन्याए जूंनी परमेस्वरए ओहत्यारर भिरिसिद नोरालाई थन थन अदैद छींङ पै थ०रिद ल्यो ताके। १४ किताव लरेंदा बाज्याव मिंए वां:फोर पो:सिद भा:सिद बाज्या, हिताव ज़ जे ब परमेस्वरए साचो ओपांर रैद भा:सिद ल्यो ताके। नो मिंए फरी ओछातीलाई जोगोइन्याए जूंनी भँए

पाता जासिज्या। हिताव ज़ जे ब परमेस्वरए ओपांत माधलिन्याए जूंनी परमेस्वरए ओपांर सतस दाव ताके। १५ किताव नो मिं उखंत पोला जासिद बाज्या, हिताव ज़ जे ब युं होलां दाव परमेस्वरए चाव ओथा प्राइंदा सथैन्याए जूंनी भा:सिद बाव ताके। १६ फरी किताव लरें दाज्याव मिंए ओधालए ला मुइलाई सोतोइज्याव, हिताव ज़ जे ब परमेस्वरलाई जेयुं उहुप्किन सैतानए ल्योनिकाव हुज्याव पांर सोतोइधुन्या जेले।

१७ फरी किताव नो मिंए ओडै जोगोइन्याए जूनी भँए तुपी जासिद बाज़्या, हिताव ज़ जे ब 'परमेस्वरए जोगोइद अजम्बरी जुनील ज़ सकेस्नावा' लिद जेयुँ सुहुप्द ल्यो ताके। फरी किताव नो मिं तरवालीस बाज़्या, हिताव ज़ जे ब छैव पुरूसए ओयासिज़्याव तरवाली रैव ताके। नो तरवाली परमेस्वरए ओपाँ ज़।

१८ एकम्या ज़ परमेस्वरए उपुरूसनी पोंखारिच्यो। प्राइँनी सैसिद जेचर्या मासैःद परमेस्वरए छैव उमीराए जूनी पोंखारिउ ज़ नैव ताके। १९ सोनो डाजूनी ब, 'परमेस्वरए चाव ओथाए ओसै माछेःद ज़ सथैव ओदैवक' लिद पोंखारिदचाव ताके। २० नो चाव ओथा सथैन्याए जूनी ओसाची डातावए भयालखानाल डापरिके। है जैद कितावनी पाँव परिन्या,

हितावनी ज़ आल ब घ्योःव युँस डापाँधुक लिद पोंखारिदचाव ताके।

तुपैन्या पाँव

२१ डा आल कितावस डालिज़्याव, नो भरी प्रभुए ओयेन सतस दाज़्याव गेयुँलाव गेभाइ तुखिकसए ल्योनी थैन्या जेले। २२ होए उजूनी ज़ नो मिंलाई जेल्योदा डापरीज़्या। आडाव गेपाँ भरी नोए ओल्योनी थैद जेयुँर होलाँ तान्या ले।

२३ जे परमेस्वरए ओपाँत बाज़्याव भरिरालाई परमेस्वर गेबाबु सोनो गेप्रभु येसु ख्रीसनी निल्योनी जेयुँ होलाँ जैद ओयाचिरक, जेयुँ हुप्द जे जेल खैवर ब ओजैचिरक। २४ गेप्रभु येसु ख्रीसए ल्योदा साचोस यार्युँ थू जैद नैज़्यावराए ल्योदा ब परमेस्वरए उयुँ ओगराँक।